



ル 5
3294
2



凡 5
3294
卷 2

昭和十八年
三月三日
請求

黔南職方紀略卷四

貴州布政使安化羅繞典

遵義府

遵義府本漢營縣地隋為牂柯郡牂柯縣之北境唐貞觀九年於牂柯縣北界置郎州領恭水高山貢山柯盈邪施釋鷲六縣十一年旋廢十三年復置更名播州播州之名始此十四年更恭水曰羅蒙高山曰舍月貢山曰湖江柯盈曰帶水邪施曰鷲為釋鷲曰胡刀十六年更羅蒙曰遵義遵義之名昉此又以故寧州之芙蓉瑯川二縣來屬顯慶五年省舍月湖江

羅爲開元二十六年省瑯川胡刀入芙蓉天寶中改稱播川郡尋復稱播州乾符初播州爲南詔所陷太原人楊端起兵復其地遂世爲其州之刺史後晉時播州附于楚王馬希範旋屬蜀孟氏宋大觀二年播州夷族楊光榮以其地內屬詔建播州領播川琅川帶水三縣蕃帥楊文貴獻地東西百二十里南北六百十二里以其地置遵義軍及遵義縣於是楊氏分爲二有播州復有遵義軍矣宣和三年廢播州爲城隸南平軍並廢播川琅川帶水三縣又廢遵義軍及遵義縣以爲遵義砦隸珍州開禧三年復遵義軍嘉

定十年仍降遵義軍爲砦端平三年復以白綿堡爲播州嘉熙三年設播州安撫使寶祐五年置鼎山縣元至元十五年詔以鼎山仍隸播州十六年改鼎山爲播川縣二十六年改播州爲播南路二十八年改爲播州軍民宣撫司領黃平府以下三十二長官所元末爲明氏所有明太祖洪武五年歸附置播州宣慰司領安撫司二曰草堂曰黃平長官司六曰播州曰真州曰餘慶曰白泥曰容山曰重安萬歷二十九年播州平分其地爲平越遵義二軍民府遵義之置府始此改真州長官司置真安州改播州長官司置

義縣與府同治白田壩以播州司所屬舊夜郎里
置桐梓縣以眞州司所屬地置綏陽縣以播州司所
屬仁懷里爲仁懷縣皆隸遵義屬四川於是遵義軍
民府領州一縣四康熙二十六年裁軍民字雍正五
年改隸貴州貴州諸府皆有親轄地惟遵義無之蓋
仍四川舊制此遵義建置之大略也府治南距省城
二百八十里遵義附郭東北二百六十里爲正安州
卽眞安州之所改也東一百里爲綏陽縣北一百二
十里爲桐梓縣西北一百六十里爲仁懷縣其四至
東一百五十里抵丁家壩交平越州湄潭縣界西五

百八十里抵老虎岔交四川叙永廳界南一百里抵
烏江隘交貴陽府修文縣界北三百六十五里抵界
牌交四川綦江縣界四隅東北五百六十里筍子蓋
與四川彭水縣交界西南一百五十里古樓隘與大
定府黔西州交界西北六百四十里大灣塘與仁懷
廳交界東南一百二十里合口隘與貴陽府開州交
界府境廣七百三十里袤四百六十五里東北至西
南袤七百一十里西北至東南袤七百六十里幅員
廣博前據烏江後倚赤水蓋黔省北蔽也 遵義縣
附郭本唐帶水縣地也貞觀九年置柯盈縣十四年

更名曰帶水宋宣和三年與播州同廢淳熙三年播州遷治其地元爲播州軍民都鎮撫司明洪武五年改置播州長官司授土酋王慈世守萬歷二十九年改置遵義縣其四至東一百一十里抵三度關交平越州湄潭縣界西一百三十里抵青坑塘交仁懷廳界南一百里抵烏江隘交貴陽府修文縣界北一百里抵婁山關交桐梓縣界四隅東北五十里長灘塘與綏陽縣交界西南一百五十里古樓塘與大定府黔西州交界西北一百二十里甕坪塘與仁懷縣交界東南一百二十里合口隘與貴陽府開州交界境

土廣二百四十里袤一百九十里東北至西南斜袤二百里西北至東南斜袤二百四十里分爲四鄉鄉復分爲數里曰東隅里曰通平里曰樂安里爲東鄉曰西隅里曰天旺里曰沙溪里爲西鄉曰南隅里曰忠莊里曰清潭里曰平水里爲南鄉曰北隅里曰永安里曰大溪里爲北鄉里分十甲凡一百三十甲山川險奧土田廣衍由湄潭而入以葛藤爲扼隘由黔西而入以古樓爲扼隘南限烏江達省之要津北阻婁山通蜀之重阻蓋裏山表河四塞之區也其地自漢置營縣以來世屬中國唐末暫失旋爲楊端所復

宋元及明楊氏雖專有其地然政教不大異于中國故其地蠻族尙少自端恢復以來有令狐成趙猶婁梁韋謝八族皆西北舊族也楊氏之滅楊氏支屬及八族子孫散滿境內又有明代軍屯之籍綜錯其間然皆漢戶也苗族惟有紅頭苗青頭苗鴉雀苗革獠四種咸自鄰封迸入不成聚落或爲傭田或墾山土其有產業者悉照漢民一例納秋折糧銀遵義諸屬大抵皆然惟苗種各異云 正安州本唐珍州也貞觀十七年置播川鎮於其地後因鎮中有降珍山因改鎮爲珍州領營德夜郎麗臯樂源四縣天寶中改

爲夜郎郡尋復爲珍州元和二年廢珍州以所領屬之溱州宋乾德三年珍州蠻酋田景遷以其地內附賜名珍州仍領四縣開寶元年改爲西高州後漸不賓服州縣皆廢大觀二年涪州夷大駱解上下族帥駱世華駱文貴獻西高州一故地廣四百五十里袤三百五十里詔以其地爲珍州亦曰樂源郡復立樂源縣爲州治咸淳末弁珍州及所屬樂源縣于播州元爲珍州思甯等處長官所屬播州宣撫司至正二十三年地入于明氏明氏改爲真州思甯等處長官司明洪武五年歸附十七年改爲真州長官司萬

歷二十九年楊氏滅改真州長官司置真安州雍正二年改爲正安州此正安州建置之大略也其四至東二百里抵老鷹關交思南府婺川縣界西一百里抵蟠龍河交桐梓縣界南一百里抵長礮交綏陽縣界北一百一十五里抵米糧坳交四川南川縣界四隅東北二百里白村壩與思南府婺川縣交界三百里筍子蓋與四川酉陽州彭水縣交界西南八十五里草果山與綏陽縣交界西北九十里羅巴塞與桐梓縣交界二百五十里郭村壩與四川涪州交界東南一百四十五里黑溪溝與石阡龍泉湄潭婺川四

處交界境地廣三百里袤二百一十五里東北自婺川界至西南斜袤二百八十五里自彭水界至西南斜袤三百八十五里西北自桐梓界至東南斜袤二百三十五里自涪州界至東南斜袤三百九十五里分爲四里曰思甯曰德溪曰三江曰小溪思甯德溪各編十甲三江小溪各編九甲共三十八甲州介巴黔之間扼蠻楚之要西南有事實當其衝州治屢經遷徙萬歷中初置州時建治于思甯里之滴水園後遷於三江里

國初又遷於德溪里之土坪皆未建城乾隆三年乃定

遷於古鳳卽今州治也四里土田肥瘠不一民人與遵義略同苗種舊有革獠花苗二種共三百餘戶今多遷徙於鄰封見惟零星數名咸依漢戶耕作未編煙戶又有鴉雀苗間與漢民錯處亦無多也桐梓縣唐珍州之夜郎縣溱州之扶歡縣也貞觀十六年置扶歡縣十七年置夜郎縣元和二年二縣皆隸溱州宋初二縣仍分隸西高溱二州後俱廢熙甯三年置扶歡砦後省大觀二年木攀首領趙泰內屬又建夜郎縣宣和二年廢夜郎縣寶祐六年又置鼎山縣於今縣南元世祖至元十五年以鼎山隸播州十六

年改爲播川縣後廢爲夜郎里屬播州司萬歷二十九年平播分置桐梓縣明洪武六年置桐梓驛萬歷二十九年平播後分置桐梓縣桐梓之置縣始此其四至東五十里抵羅五山交綏陽縣界西八十里抵牛渡河交仁懷縣界南三十里抵婁山關交遵義縣界北二百六十里抵界牌交四川綦江縣界四隅東北四百五十里大凹溝與四川南川縣交界四百二十里深坑與正安州交界西南四十五里楠木廠與遵義縣交界西北一百六十里水潦與仁懷縣交界東南五十里石炭關與遵義縣交界境地廣一百三

十里袤二百九十里東北自南川界至西南斜袤四百九十五里自正安界至西南斜袤四百六十五里西北至東南斜袤二百一十里分爲五里曰東芝曰溱溪曰蘆溪曰夜郎曰婁化夜郎編十一甲餘四里均十甲共五十一甲縣地爲四川入黔首程與川省綦江南川二縣犬牙相錯郡轄四屬咸與接壤控扼之要區也明季嬰獻賊之亂民死于兵者半死于病者半室存人亡者數年乃漸復業遂以遵義尙爲完備之區差徭倍于他郡康熙中居民報墾避重就輕於是新墾之士田咸歸綦江南川二縣故二縣地多

華離在桐梓也東芝之好芝壩蘆溪之黑石溪溱溪之元田壩俱有溝堰蓄洩土田稱膏腴焉夜郎婁化二里土俱瘠塉其民人皆漢戶苗種舊有革獠鴉鵲紅頭三種共六百六十餘戶近日遷興義安南諸處略盡惟散住零星苗戶一百十七戶而已亦均薙髮編入里甲無異漢民 綏陽縣本唐遵義芙蓉二縣地貞觀九年置恭水縣爲播州郭下縣其五年置芙蓉縣爲邗州郭下縣旋廢州改芙蓉縣隸智州十一年智州更名牢州十六年廢牢州改芙蓉縣隸播州又更恭水曰遵義宋初遵義芙蓉二縣尙隸播州元

豐後皆廢大觀二年置遵義軍及縣旋廢元至元二十一年立遵義總管府隸順元宣撫司後省其地入珍州思甯長官所明初地屬真州長官司平播後始置綏陽縣以地近唐時夷州之綏陽故縣得名非唐綏陽縣地也其四至東八十里抵萬壽場交平越湄潭縣界西四十里抵四面山交遵義縣界南三十里抵鄭家場交遵義縣界北三百里抵雷家場交桐梓縣界四隅東北一百五十里九曲水及公館槽皆與正安交界西南六十里繖水場與遵義縣交界西北一百五十里羅五山與桐梓縣交界東南八十里對

插凹與遵義湄潭兩縣交界境地廣一百二十里袤三百三十里東北至西南斜袤二百一十里西北至東南斜袤二百三十里分爲四里曰金竹曰朗水曰趙家曰望草里編十甲凡四十甲縣境四山環繞爲蜀東之門戶黔地之咽喉居民多屬漢戶苗類惟花苗鴉雀紅頭三種而已花苗能織麻布製木盤善捕禽獸昏喪歲時俱以牛犬爲禮紅頭鴉雀居處服食與漢人同通屬漢莊一百五十苗寨十一苗戶計五十二然皆入編戶中無甚區別金竹里之七八兩甲近湄潭趙家里之四五兩甲近桐梓咸去城遼遠居

民多爭控界址蓋三縣之間原無界石也 仁懷縣
宋滋純二州地也大觀三年以瀘夷地建滋州純州
置承流仁懷九支樂共四縣仁懷之名昉此宣和三
年廢滋州爲武都城以仁懷縣爲堡并承流縣併入焉
廢純州爲九支城樂共縣爲樂共城宋元之際地入
播州爲仁懷里屬播州司明平播始復置仁懷縣其
四至東一百里抵小溪里交桐梓縣界西三百二十
里抵三合樹老虎岔二處交四川叙永廳界南一百
四十里抵李博里交遵義縣及大定府黔西州界北
三百八十里抵二郎里及赤水里交仁懷廳界四隅

東北四百四十里赤水里丁山里溫水汛三處皆與
四川綦江縣交界又五百里與四川江津合江兩縣
交界西南一百三十里黎民隘與大定府黔西州交
界西北三百八十里甕坪塘大灣塘與仁懷廳交界
東南一百四十里並壩塘與遵義縣交界境地廣四
百二十里袤五百二十里東北自綦江界至西南斜
袤五百七十里自江津合江界至西南六百三十里
西北至東南斜袤五百二十里幅員極爲廣博分爲
七里曰李博曰安羅曰二郎曰小溪曰吼灘曰赤水
曰丁山里編十甲共七十甲安羅李博爲上二里二

郎以下爲下五里上二里與蜀省之永甯及大定黔
西連界下五里與蜀省之叙永廳綦江江津合江等
縣交錯距城四五百里不等土田最高者爲箐地次
爲半山下爲花廠箐地高冷宜稻菽粟稗高粱玉蜀
黍而玉蜀黍尤爲日用之需土人名曰包穀也其稻
植之於山阜彎環處可斗種而石收平廠之處可斗
種而二石收久雨則損秧早稼則被凍晚或爲風落
故箐地之田價極賤居民率於清明之前往花廠佃
田栽秧而後移種於箐地花廠地低近河居民多種
棉花故名居民漢戶爲多苗類有青夷白夷仲家羅
羅羅鬼青荈獠紅獠獠紅頭鴉雀馬韉十種青夷白
夷狃家能通漢語漸染華風餘尙循夷俗無土司管
轄通屬漢戶什之六七苗戶什之三四然苗漢無猜
土田皆一律編入里甲云

仁懷直隸廳

仁懷直隸廳宋純滋藍三州地也藍州置自唐元和
初宋因之元爲永甯路土俗譌藍爲蘭世遂稱爲蘭
州其故墟在今廳城西南二百里唐朝置純州宋大
觀二年置治九支縣宣和三年州廢改縣爲九支城
今廳西北廿里隔河合江縣之九支壩卽宋九支故

墟也滋州亦大觀三年置領承流仁懷二縣宣和三
年廢州爲武都城今廳治西南一百五十里土城里
一名甕城卽滋州及武都舊墟蓋武都譌土滋譌爲
甕也仁懷縣亦大觀三年置宣和三年廢爲堡廳治
西南三十里舊仁懷場今稱復興場卽其地也宋元
之際地入播州爲仁懷里屬播州司平播後設仁懷
縣于今廳治管里十雍正八年移縣治于李博里之
亭子壩卽今仁懷縣也移通判駐明仁懷縣治卽今
廳城也乾隆三年以附近之河西仁懷土城三里歸
通判管轄四十一年改爲直隸同知仁懷直隸廳之

設始此廳城東南距省城九百七十里其四至東一
百八十里抵仁懷縣赤水里界西一百二十里抵四
川叙永廳青化里界南三百六十里抵板橋河交仁
懷縣二郎里界北渡赤水河卽抵四川合江縣富家
凹界四隅東北十里鯉魚溪與合江縣丁山支交界
西南三百二十里抵黃葛沱交仁懷縣二郎里界西
北二十里完碛與合江縣九支壩交界東南二百四
十里抵圖書壩與仁懷縣吼灘里交界境地廣三百
里袤三百六十里東北至西南斜袤三百三十里西
北至東南二百六十里廳界赤水河可通舟楫其水

白仁懷縣岔角灘流入東北行三百八十里至廳治
北又東北行十里至鈴鈴灘入合江縣界廳治三面
距蜀劃江而守最爲扼要仁懷里編五甲一甲二甲
三甲在城東距城自二里至八十里不等四甲在城
南距城自一里至三十里不等五甲在城西距城自
一里至三十五里不等而舊仁懷屬五甲管轄河西
里四甲皆在城西距城自二十里至一百四十里不
等土城里四甲皆在城南距城自九十里至三百六
十里不等土城場在二甲唐朝壩在四甲也仁懷河
西二里水田較多頗稱腴壤土城地氣瘠薄人民宜

雜糧漢戶爲多土城與叙永廳仁懷縣二處交錯又
爲蜀鹽商船屯泊之所客戶亦繁苗惟馬鞞一種性
淳隨所佃之土爲居遷徙無常無土司管轄通屬皆
漢莊苗民零星散處僅七八十戶而已

黔南職方紀略卷四終

黔南職方紀略卷五

貴州布政使安化羅繞典輯

都勻府

都勻府唐應州地晉天福間有都雲酋長尹懷昌率所部附於馬希範都雲之名始見自元及明或置都雲軍民府或置定遠府或置麻峽都勻等縣或置都勻安撫司尋復廢縣為長官司改清平堡為清平衛易麻峽為麻哈降安撫為衛廢置既各不同或屬管番民總管或隸湖廣行省或隸貴州都司或隸布政司轄領亦不相襲宏治六年卽衛城增置都勻府以

衛屬長官司隸之又增樂平平定二長官司八年改
麻哈長官司爲麻哈州九名九姓獨山長官司爲獨
山州清平長官司爲清平縣均隸府正德間以播州
之安甯安撫司改爲凱里來屬康熙七年省清平縣
入麻哈州十一年復置清平縣省衛入縣以新添之
丹行長官司來屬而改都勻衛爲縣爲附郭十二年
以府屬長官司并屬都勻縣雍正八年經略張廣泗
開八寨丹江都江各苗疆設官分駐俱隸府十年以
廣西慶遠府之荔波縣來屬荔波於宋元時爲羈縻
荔波州又爲南丹安撫司明洪武元年并入思恩縣

十七年析置荔波縣屬慶遠府後隸貴州都司順治
間仍屬慶遠府今府屬共有九屬親轄之外其縣曰
都勻曰清平曰荔波其州曰麻哈曰獨山其同知曰
八寨其通判曰丹江曰都江並府親轄共爲九屬其
凱里縣丞則清平之分轄者也方村縣丞則荔波之
分轄者也三腳壘州同則獨山之分轄者也今日設
官之制大概如是府治在省城東南三百里其四至
東抵黎平府之古州西抵貴陽府之貴定縣北抵平
越直隸州南抵廣西南丹土州之邊境其四隅東南
爲古州界西南爲定番州界東北爲台拱廳界西北

爲平越州界都勻縣附郭府治北五十里爲麻哈州
東北百一十里爲清平縣南以西百二十里爲獨山
州由獨山州之南折而東在府治西南二百里爲荔
波縣至於新闢三廳在府之東九十里則八寨同知
駐焉由八寨而東南去府二百四十里則都江通判
駐焉由八寨而東北去府一百六十里則丹江通判
駐焉八寨於明爲天垣土司地生苗戕害土司致成
化外非若丹江都江之阻深閭昧本係化外生苗也
府境廣袤之勢其大概則又如足今省城以東龍里
貴定爲滇楚要衝至通粵之途則由貴定南出至都

勻而都勻亦爲一大都會其地久歸版宇商賈輻輳
漢苗夾雜而居都江清江諸源皆始於郡而清江源
尤遠其舟楫直抵郡城府幅員寬闊苗民固多漢民
亦復不少其寨落有悉住苗民者並有悉住漢民者
雖其地羣峯疊嶂跬步皆山然而溪流縈繞水泉沮
洳每多膏腴之田客民之貿易流寓其間易於託足
焉 都勻府親轄地順治初設長官司八員曰都勻
正副曰邦水曰丹平曰丹行曰平州曰平浪曰天垣
康熙雍正間疊裁丹平丹行平州平浪長官司而於
平州設土把總一員平浪設土舍一員改丹平爲六

洞設土舍一員以丹行司地設牙舟汎與凱口岩埋
巴榔四處爲四牌各設鄉約管束而裁天垣司歸轄
八寨今都勻正司所管之地在府治南七十里與獨
山州之獨山司地聯界土人呼爲吳家司其副司所
管之地在府治東南九十五里與獨山州之普安司
及八寨廳之得祿塘交界土人呼爲王家司其邦水
司在府城西十五里其所管之地又西五十五里至
擺忙寨與貴定縣屬之甕順河交界惟平州六洞兩
司去府治爲最遠由府城西南行至平浪司折而南
爲平州司去平州之西三十里爲六洞司府治至兩

司幾二百里南接廣西之南丹土州僅十餘里西距
定番州之大塘抵藤茶河爲界東倚獨山州之豐甯
下司兩司所管悉係狝家地遠而僻介居兩省爲四
屬接壤之交匪徒畏罪多潛匿其間平浪司西接貴
定縣屬之大小平伐所管多狝家地連邦水雖云邊
遠以視平州六洞二司則均爲腹地矣統計府屬六
土司四牌典買苗產者二千三百九十六戶未典買
苗產者二百三十四戶住居城市不填丁口客戶四
十二戶三共客民二千六百七十二戶又縣屬五所
之地雖與府屬各司插花其寨落尚皆綴聚非若松

桃汛堡牙交繡錯於苗寨之中是以縣屬客民偶亦有典買府屬苗產之戶然皆已附見於府屬各司之籍內 八寨廳與都江固爲黔粵衝途而都江爲水程入寨則陸站下接三腳上承勻郡皆不及百里苗情刁敝而客民雜處偏多自郡城東南行過雞賈河經得祿塘由二登高大登高而上歷數千級始下下不滿數百級卽爲平衍之地越入寨城折而西南行過五里鋪至羊甲塘下山愈下愈深由山溝趨羊忙塘出八甲境直抵三腳由八寨城而望四面羣峯圍繞入寨居山巔平地土厚而肥土厚之處每患乏水

泉而入寨則龍井龍塘到處皆有種宜菽麥蕎梁風土無殊關右此恃險而頑從前所以有戕害土司之事而遂成化外也廳境共設四土司一衛近城三司天坝土千總一員今呼爲天司在城北楊武士把總一員今呼爲楊司在城南永安土把總一員今呼爲雷司在城東八寨衛所轄十三堡卽散布三司之間惟王司土把總遠在排調去廳東南一百八十餘里直與古州丹江接壤廳之邊境共設卡房七座西北至都勻府之雞賈塘入境曰一碗井卡東北至麻哈屬之甕城河入境曰排乍坡卡東自丹江屬之烏商

寨入境曰烏的卡又東自丹江屬豆南寨入境曰竹
畱卡南之東自都江之喬礫場沿丹江之喬配山入
境曰烏落卡南自都江之雅灰寨入境曰方勝卡西
南自獨山州之羊勇坡入境曰七里沖卡一碗井七
里沖兩處今爲大道餘五處類皆出入咽喉泥丸可
塞險隘逾於各屬統計廳屬四司一衛典買苗產客
民七百二十四戶未填丁口及蓬戶在內未典買苗
產客民五十六戶二共客民七百八十戶 丹江廳
地多險隘爲上下九股之門戶都江古州台拱四面
相環僅西北一隅丹江衛各堡毗連凱里熟苗之地

於苗疆中尤爲扼要之廳昔張經略所以費經營於
雍正六年而又大加搜剔於乾隆元年者也牛皮箐
綿亘新疆之中於丹江爲南境於古州爲北境清江
台拱抱於左八寨都江倚於右經略疏中云其峭壁
懸巖高出雲表深林密樹霧雨不開泥濘沒膝蛇虺
交行不特人跡罕到卽本地苗蠻亦祇知附近大概
斯言不謬今封禁已久文武官猶復按季會哨其中
相距地究不滿百里非民苗之不敢擅入也實緣箐
內非石卽木無土可耕且陰寒之氣逼人甚厲所以
歷年於茲棄與毒蛇猛獸耳其餘各寨之山荒土遼

闕貧民挖種住居既久日漸增多或三二里一戶或十里八里三戶五戶苗寨中住居漢戶典買苗產者不見其多而種山客民則日益月盛且山係公山土無專主離寨近者尚須向寨頭承租離寨遠者不肖客戶欺侮愚苗每多佔種此丹江情形也廳屬雞講司土千總所轄之寨於牛皮箐爲最近黃茅司土千總所轄之寨半居廳之北境接台拱之臺盤臺雄等寨半爲廳之南境接都江之喬礫八寨之烏落等寨其烏登司土千總所轄之寨悉居廳之西境西以北烏耶關與清平之松林塘麻哈之籐鋪交界西以南

皆爲八寨地四境荒山蔓延苗寨不相聯屬種山客戶亦散漫無歸宵小匪人得以潛踪混跡今各分甲牌有三頭甲有甲長一牌有一牌之稽考一甲有一甲之管束丹江衛空堡亦聯綴其間各堡屯軍一概編聯牌內統計丹江廳屬三司客戶共一百一十九牌內有產之戶五百七十五戶無業之戶六百四十九戶計一千二百二十四戶每司各設客長鄉約數名約束牌頭互相稽查而隔屬居住典買苗產不填丁口客戶又三十七戶二共客民一千二百六十一戶 都江廳卽來牛寨地居黔粵之衝自廳城沂

流而上至打略塘交獨山州界僅四十里自廳城順
流而下至平字塘接古州界亦四十里溜急灘高兩
岸皆危峯絕嶂無復土田南北袤延百里而近廳以
西懸崖絕壑無路可通抑且寨落凋零每寨多不滿
三四十戶土薄而冷閒有開墾成田每患雨水所沖
土坍石見是以客民無所圖利卽苗民亦鮮蓋藏自
廳城下三十里由壩塔循山溝而進西南行三日達
荔波自廳城之北而東抵古州之高排寨七十餘里
東以北抵丹江之喬配寨百六十餘里皆羊場鳥道
苗寨尚多然其地甚瘠本地苗民且不聊生客民又

何從託足是以苗寨內絕無貿易手藝之戶卽刨挖
山土悉係苗人亦無蓬戶今設順德營土千總一員
管五十三寨歸仁營土千總一員管五十三寨統計
廳境兩營典買苗產客民四百三十五戶並住居都
江廳城未填丁口者三十一戶二共客民四百六十
六戶 都勻縣轄懷德從化二里二十四牌悉係漢
民並無苗戶其田悉係軍田完納軍糧並無民田是
以亦無苗產縣境間有苗人多係與漢戶傭工耕種
麻哈州東西廣不及二百里南北袤不及百里四
面爲都勻貴陽平越兩府一州各縣環繞麻哈江在

州之南平定河在州之東樂平溪在州之西地雖最
爾彈丸苗種甚多客民之錯處其間亦復不少此通
志所以云達荆楚之輓輸號苗蠻之窟穴也原轄平
定樂平長官司二員後增設養鷺司土千總一員宣
威落戶麻哈舊司土舍四員七司共管漢苗二百一
十寨有奇樂平司在治之西地接貴定平定司在治
之東地接府屬之太平營落戶司在治之南地接都
勻縣界麻哈司在治之北地接清平治西北爲舊司
治東南爲養鷺宣威二司今統分爲平洗必撥橋頭
及平定樂平養鷺宣威落戶舊司郎洞等十牌別在口

蒙戎計羊擺地羊場歸州甕袍天家郎了等八牌不
經土司管轄幾及百寨其寨有悉住漢民並亦無典
買苗人田土者亦有悉住苗民亦無田地典賣與漢
人者至於漢苗夾雜之寨各司多寡不同而每寨中
有產客民較之無產之客民則相倍蓰統計七司八
牌典買苗產並不填丁口客戶共六百七十九戶未
典買苗產者二百五十四戶蓬戶未置苗產者三十
八戶三共客民九百七十一戶 獨山州山多田少
所轄凡六司城之南二里爲服色土同知所轄之地
今名爲獨山司又南爲豐甯上司又南爲豐甯下司

由州治至下司計程已七十五里再南四十里與廣西之六寨汛交界由下司而西三十里與廣西之南丹土州交界三捧司界址爲最小在下司之東二十里南爲荔波北接爛土爛土司介居普安三捧之間其南境有與荔波之三洞羊安二里爲界者普安司在三腳壘之北卽元時陳蒙州之故址也豐甯上下爛土獨山三司均係狄人狛人苗人言語各有不同狛狛二種所居之寨不容客戶客戶皆成聚落居於坡嶺之上狛人多不自認爲苗三捧地接南丹山高峯陡客民爲尤少惟普安卽三腳州同分轄之地與

都江八寨犬牙相錯有客民之寨比比皆是故客民爲最多其次則獨山司附近州治地多平行故亦有客民餘各司所有客戶不過租土挖種而已種土之戶零星散處似與蓬戶相等實非蓬戶也統計州屬六司典買苗產客民六百九十戶未典買苗產者六十三戶二共客民七百五十三戶 清平縣上承楊老下抵重安驛路所經縣境本五方雜處兼之其地產鉛廠務所在流民聚焉今縣分三里曰永清曰太平曰凱里永清里稱甲上所地係前明衛堡田悉軍田民皆漢民太平里稱牌地係前明長官司苗寨其

寨落多在縣境東北地接台拱丹江又與鉛廠相近里內共四十三寨其十寨並無客戶其三十三寨俱係漢苗雜處舊安甯安撫司地名爲凱里凱里所轄有里地有莊地又設有巖頭樂榜土千總兩員雍正十年設縣丞駐其地乾隆三年又益之以鎮遠屬之臻洞土把總一員是爲凱里三司其三司地悉爲苗產里地莊地則久爲民產大抵清平縣屬不特漢苗混淆抑且田土輻輳統計縣屬之太平里並縣丞屬之三司典買苗產客民六百五十二戶未典買苗產者九百九十九戶隔屬居住不填丁口者二百一十

一戶三共客民一千八百六十二戶 荔波縣南百四十里抵廣西慶遠府屬南丹土州海利村界東南百一十里抵廣西慶遠府屬思恩縣覃村界西接獨山州之豐甯下司北接獨山州之爛土司四境距城皆不及百里惟東北一隅地接古州都江各寨百里而遙其境分爲一十六里共管五百餘村縣治正北之羊安里介居三洞水漣二里之中地接獨山州之爛土司所管十八村並無漢民其時來瑤慶二里居縣東境又東爲巴容里地接古州八開土司所管之瑤慮苗寨東以北之久遷里地接都江屬之河東塘

通都江之垣堦爲古州入境之路近城西門外爲蒙石里西以南三十里爲巴灰里西以北爲羊奉巴乃二里縣之南山重嶺複村落最少僅董界一里直接南丹州界縣西北方村里爲獨山州入境大道荔波縣之縣丞駐焉其周覃鴛甫猺台三里皆爲縣之境苗類爲狝狎狒狒獐獍六種此外尚有狝家其男人均皆薙髮與漢無殊聚處之所曰村不名爲寨里有多至七十餘村者有少不過十餘村者縣境漢民亦復不少而各村之中不容漢戶其俗相沿已久因而各漢戶散處山坡間或結爲塲市大約久遷方村

塘汛所經蒙石去城不遠猺慶董界地方寬闊此數里客民特多統計縣屬漢苗夾雜之里一十有五典買苗產客民一千八百八十四戶未典買苗產者三百四十一戶蓬戶四十二戶三共客民二千二百六十七戶 統計都勻一府八屬有苗產客民八千三百九十八戶不填丁口及種山蓬戶在內未典買苗產客民二千六百三十四戶二共一萬一千零三十二戶

平越直隸州

平越州唐牂州地元明之際統於播州爲平月長官

地洪武十四年置平越衛軍民指揮使司隸四川布政司尋改隸貴州都司而平越之名始見至萬歷二十八年平播州宣慰司楊應龍分其地爲二北屬蜀者爲遵義府南屬黔者爲平越府於是就平越衛設軍民府而以黃平安撫司置黃平州以草塘雍水二長官司置甕安縣以餘慶縣白泥二長官司置餘慶縣以苦竹壩三里七牌置湄潭縣皆播州宣慰司地康熙十一年改平越衛爲縣附郭徙黃平州治於興隆衛省衛入州平越府始裁軍民字樣嘉慶三年改府爲直隸州改黃平州 鎮遠府裁平越縣併歸州

轄今領縣三甕安湄潭餘慶是也其境在省城東一百七十里東抵鎮遠府之黃平州西抵貴陽府之開州南抵都勻府之都勻縣北抵思南府之婺川縣東南接都勻府清平縣界西南接貴陽府貴定縣界東北接遵義府遵義縣界西北接貴陽府開州界清江水限於西重安江環其南巖門江貫乎中境內諸水多匯焉以達烏江作省會之藩籬據楚蜀之要害四牡皇華取道於是洵邊方衝劇之地苗蠻叢聚之區也 平越直隸州親轄之地有舊府轄地有向日平越縣轄之地平越縣屬地方由衛改設原設前後左

右中五所每所村寨多寡不齊五所悉係軍田並無苗產今雖併入州轄與州屬之地軍田苗田判然有別州屬親轄之地爲洪邊喬水石板樂邦江邊江冷麻哈三堡王卡等九牌又楊義長官司所轄之地爲羅歪地送解隆羊場兔場等五牌別有高平土千總所轄爲高一高二高三高四四牌中坪土舍所轄爲中坪牌共十九牌又有上格下格地方統計爲十九牌二格漢多苗少州屬別有五牌其名與楊義司所管之五牌相同而司管之牌別加一楊字解隆則曰楊解地送則曰楊地羅歪則曰楊羅羊場則曰楊羊

兔場則曰楊兔其州屬之解隆五牌及洪邊九牌皆爲漢寨惟解隆五牌與司地牙交繡錯耳楊義土司金家良之遠祖於唐爲金筑安撫司宋元時授爲金筑府土知府明洪武間分其支子爲楊義長官司累傳至雍正三年金履殿之子金玉承襲職部頒印信迄今不替所轄之地與清平縣屬之西北西南正西三面諸苗寨繡錯牙交司之南卽楊老驛也州屬除楊義高坪中坪三司之外並無苗寨所住之漢戶半係前明洪武間安插之戶及至削平播難苗戶凋零十存一二經督撫李郭諸公重爲釐定將舊日荒蕪

苗產丈量定賦聽各省客民願佔籍者酌價繳官以充建立城池衙門驛傳諸費二年之外一律起科於是客民之開墾官荒又復不少此又客民住居苗地耕苗產之原也後來客民益寡今統計有苗產客民一百七十三戶無苗產客民八百二十一戶二共客民九百九十四戶 餘慶縣在州之東北四十里縣境東至石阡西接甕安北抵湄潭其南爲鎮遠府屬之施秉黃平北鄙縣屬僅有獐猪一種戶口無多不成寨落依傍漢戶而居傭佃營生均無田土蓋黔省自貴陽以東直至思州綿延五百餘里驛道灑南都

勻麻哈清江台拱悉係生熟苗疆驛道以北石阡龍泉及思南各屬皆爲田楊二宣慰世守之地故餘慶一縣雖設有餘慶土縣丞一員白泥土主簿一員皆緣前明平播後改長官司設縣之時毛楊兩姓勦裔未便以無故革除相沿至今準其襲職藉以彈壓土人並無應管苗戶也 甕安縣在府治北六十里湄潭縣又在餘慶甕安之北去府治二百二十里甕安西抵開州東抵黃平北接湄潭南聯州屬所轄地方六里悉係漢民僅有獐猪苗人數百戶散居各寨爲漢客戶傭工並無產業現雖設有草塘甕水土縣丞

兩員亦不過管東土人而已湄潭則東至石阡西至遵義南昆甕安其北則直抵龍泉縣界地居巖門江外去州治爲最遠所轄寶善新化經正啟祥四里均係漢戶聚族而居並無苗戶蓋二縣地居黔楚大道之北不與有苗州縣相錯也

黔南職方紀略卷五終

黔南職方紀略卷六

貴州布政使安化羅繞典輯

黎平府

黎平府地唐以前稱名不一爲武陵沅陵等郡爲鐔城龍檨夜郎朗溪思微渭溪潭陽等縣爲巫州舞州沅州敘州古州福祿等州宋爲羈縻敘州後設平州元設古州八萬軍民府尋改爲長官司屬思州安撫司隸湖廣行省洪武三年置湖耳潭溪等十四洞蠻彝長官司隸思州宣慰司永樂十一年廢司設府以古州曹滴潭溪八舟洪舟西山福祿永從七長官司

置黎平府以湖耳亮砦歐陽新化龍里中林赤溪七
長官司置新化府並隸貴州布政司宣德間省新化
府入黎平旋廢福祿永從司置永從縣萬歷間改隸
湖廣尋復仍隸貴州順治康熙間疊革曹滴赤溪南
洞西山等司雍正三年以湖南之銅鼓五開二衛來
屬五年改衛設縣以五開爲開泰以銅鼓爲錦屏又
以湖南靖州之天柱縣來屬七年張經略開闢化外
生苗設同知駐古州而以天柱縣屬鎮遠府今領縣
三附郭曰開泰府南六十里曰永從府東北一百二
十里曰錦屏今降爲鄉分訪同知一府西一百八十

里曰古州分防通判一府西南一百四十里曰下江
其境北抵鎮遠府之清江邛水西抵都勻府之都江
荔波東南兩面則湖廣靖州之會同通道等縣廣西
柳州府之懷遠羅城等縣廣五百里袤四百餘里地
在省會東南千里而遙清江北環都江南繞界居楚
粵之交洵下游之要輔也 黎平府親轄潭溪正副
湖耳正副洪州正副歐陽正副新化亮寨八舟中林
龍里古州三郎長官司十五員各司苗寨多寡不一
多者至七八十寨少亦有一二十寨此外尚有親轄
之西山二十八寨天甫歸弓等內外六洞又有經歷

司所轄之廢曹滴司三十二寨西路南路四十七寨
及洪州司吏目所轄之八寨皆不歸土司管東西山
二十八寨地接永從之西山遠在古州江西岸去府
三站苗民最爲醇樸其土田瘠薄道遠而僻是以客
民稀少十五司地並經歷所轄廢曹滴司及南路西
路其苗寨皆與錦開二邑屯所相爲錯綜有一苗寨
卽有一屯或一所相去或一里或半里其安插之意
無非欲張犄角之勢與松桃之坡西坡東安堡設汛
事同一律也屯所之戶明初軍籍十居其三外來客
民十居其七今日皆成土著與苗寨畏聯已各交好

往來睦鄰之道例所不禁其十五司各寨苗民蓋洞
苗居其七高坡苗居其三高坡苗悉皆蓄髮洞苗則
薙髮而易漢服者已過半黎郡歲科考試府學額入
二十五名內例取苗生十三名是以讀書識字之苗
民各寨俱有其間客民之住居苗寨者又較別地爲
多蓋其地雖有崇山峻嶺而兩山之中每多平壩溪
流迴繞田悉膏腴村墟鱗比人戶稠密其富庶之象
易起客民覬覦之心且地利肥美物產豐亨山土種
木棉苗婦勤於織紡杉木茶林到處皆有於是客民
之貿易者手藝者鄰省鄰府接踵而來此客民所以

多也然而開泰縣所管八堡十五所錦屏鄉所管城
內九甲城外十二屯自改衛爲縣時軍屯皆成土著
身住屯所業落苗寨視彼鄰省鄰府客民跋涉相依
尤爲捷便況苗民家道旣裕又曉文義族類蕃多同
氣相助間有力薄棄產之戶不待客民計議籌畫合
寨有力苗民已將田土壟斷而得縱有可圖之產又
爲府縣兩屬之土著平日眈眈於側者捷足先登客
民始計未嘗不借徑於貿易手藝窺伺苗產及至身
入苗寨已則勢孤竟無從得土田故苗寨客民雖多
於他地而客民當買田土則又寥寥者也天甫六洞

每洞不過一兩寨計六洞僅十餘寨又有清水江邊
之三江九寨當即吏目所轄之地皆不歸土司管轄山高嶺峻
高坡苗聚族而居土多田少客戶數人悉皆承佃苗
土租挖苗人公山之蓬戶其蓬戶土有定址住有定
向與古州一帶蓬戶相同大率典買苗產者十居五
六非若鎮遠之抱金印水蓬戶遷徙靡常也錦屏鄉
幅幘狹小其十二屯今分爲內七屯外五屯皆聚處
一隅開泰則每所少者十屯多者至三十屯共設至
三百數十屯堡之多其間苗買客產客買苗產轉輾
售賣未易清釐開泰縣屬又有苗光里及天堂平客

等八洞地苗光則地近清江今已漢多苗少八洞則危峯疊嶂地僻道遠皆係高坡苗所居客民無所圖利有產無產兩者俱少僅蓬民數十戶而已統計府轄地典買苗產客民四百九十四戶貿易手藝營生未典買苗產客民一千七百十六戶蓬戶二百四十二戶府縣兩屬屯所客民附居苗寨及未附居苗寨者共二千四百五十二戶縣屬之天堂八洞典買苗產僅一戶未典買苗產在寨貿易營生者僅二戶又蓬民三十八戶 古州廳地方遼闊形勢險峻苗種繁衍歷代以來皆棄諸化外黎郡孤懸江表來年定

旦未通以前繞道天柱鎮遠始達省城雍正四年謬衝之役張經略適守黎平於古州苗情地利已得梗概其後以八年乘丹江之勝統兵由清水江至岑隴取道黎平以進九年七月上中下三保就撫始築城於諸葛營十年移開泰縣縣丞改駐朗洞然其間擺調方勝滾宗日月諸寨貌受約束心懷叵測時猶梗塞河道經略遷兩湖去黔未久而十三年古州苗卽有王嶺樂鄉之變延至乾隆元年痛加懲創各寨凶苗芟夷殆盡建屯設衛始有安居蓋古州有裏外之分今日之建城置鎮乃裏古州也其地西接荔波東

聯府屬南抵粵西北距丹江都江界於西北下江接
於東南東南爲清江苗地西南則粵省咽喉今設山
丹八開等司土千總六名高表平江等司土把總二
名由司頒發鈐記襲充高文平允等司土舍五名由
廳舉充準給頂戴分管各寨此外尙有已裁之平字
高武士舍二名計二十一寨並府屬三郎司舊管之
十寨歸廳親轄通計廳屬三百五十一寨共設古州
左右二衛屯軍二千六百餘名領之以千總二員分
屯各堡星羅碁布與各苗寨牙交繡錯原其設屯之
始所以詰奸禁暴稽察漢奸播煽愚苗及熟苗潛入

私相勾引迄今日久其流弊幾與前明之五開銅鼓
二衛相等見在外來客民未易窺測而兩衛屯軍實
逼處此侵削刻剝其病旣深況住居苗寨有干例禁
而住居屯堡則未有明文邇年以來客民之依傍屯
軍潛身汎堡而耽耽苗寨者亦復不少矣今統計土
弁土舍所管並歸廳管轄各苗寨住居典買苗寨客
民共一千二百六十七戶貿易手藝未典買苗產客
民共一千零八十八戶蓬戶共一千一百八十八戶兩衛
典買苗產屯軍及住居屯堡客民典買苗產未填丁
口者共二百二十一戶朗洞縣丞無親轄之苗寨悉

歸土弁土舍管轄 下江廳左擁永從右抱古州地
雖褊小而古州江界乎其中處黔粵之要衝由古州
順流而下百里而近由粵界泝流而上百里而遙兩
省客民逗遛甚便且古州下江之交大江西岸地近
粵境別有生苗一種素稱恭順懦弱易愚向爲楚南
永鳳一帶紅苗之所欺侮道光三年因紅苗佔種構
釁釀成大獄綜計其寨凡有六十分轄於古州下江
二縣古州所轄三十六寨爲八開土弁林文溥所管
下江所轄則二十四寨而已其道由古州而上至定
道與馬難行其中並無客民生

苗種近高坡不諳文義比之台拱清江尤爲樸野當
買田亦用木刻居多統計下江廳屬大小共九十
四寨與買苗產及承佃苗土之戶共計五百三十九
戶 永從縣城內分爲四甲城東二十里抵府屬洪
州司界城西十里抵府屬潭溪司界城北五里抵開
泰縣屬滿團屯界其四甲居住及近城之赤杉六冲
悉皆土著惟城南所轄頓洞等六洞並西山大小苗
寨及分駐丙妹縣丞所屬共一百七十四寨爲漢苗
夾雜之區頓洞等六洞苗民種類雖與府屬相同而
苗寨不與屯所雜居自正統間長官爭襲改司爲縣

時客民卽積漸而入各洞寨雖有多寡不同而典買苗產者甚至一戶有多至數百分者其苗民之殷實亦不能如府屬之潭溪湖耳各司故田產多出售於客民也西山與府屬西山同爲廢西山陽洞司地司廢後府縣共分其地縣屬苗寨較府略多苗寨客民情形則與府縣相類丙妹所屬在縣治西一百二十里半皆夾江而居黔粵要衝鹽旗分埠是以客戶亦復不少統計縣屬六洞西山及丙妹縣丞所轄典買苗產客民共二百九十七戶貿易手藝營生未典買苗產客民共四百零八戶蓬戶共一十七戶

統計黎平府屬各廳縣有產無產寨內寨外並不煩丁口客民共七千五百零二戶

鎮遠府

鎮遠府地自明以前田氏內附世守其土永樂十一年革宣慰司始新置府縣隸貴州布政司正統九年置施秉縣宏治十一年置鎮遠縣康熙二十二年省湖廣之鎮遠衛入鎮遠縣二十六年省湖廣之偏橋衛入施秉縣雍正八年開清江苗疆設同知駐其地十一年平台拱地移清江同知駐焉別設通判駐清江而以黎平府之天柱縣來屬嘉慶初平越府降爲

州始割所屬之黃平州并入府轄現領縣三州一分防同知一通判一共六屬其界西接平越西北爲湄潭餘慶北毗思南東北爲石阡銅仁東距思州東南爲湖南之靖州會同南抵黎平西南接都勻府之丹江凱里附郭爲鎮遠縣西六十里爲施秉縣又西一百二十里爲黃平州東南一百八十里爲天柱縣西南一百四十里爲台拱廳南一百九十里爲清江廳郡境幅員廣闊舟楫東來商賈雲屯實滇黔門戶之孔道也 鎮遠府親轄地北抵思南府界北以東爲石阡銅仁思州界北以西爲餘慶湄潭平越界宋元

以前皆田宣慰地明初卽歸版宇府屬北境內並無苗地府東南九十里爲鎮遠縣印水縣丞分駐之地官係縣屬地歸府轄設印水蠻彝正副長官二員外又有偏橋正左右長官司三員其地環衛施秉縣城北爲正司東爲左司南爲右司印水以西勝乘以東及偏橋左右兩司並鎮遠縣南鄙之苗度洞皆爲漢苗接壤之地由此而南悉皆九股生苗今日之清江台拱柳霽等處是也偏橋正司並無苗戶其左右兩司所管寨落自勝乘石洞口迤邐而東直接印水縣丞所管之邊方上下二里盡皆苗漢雜處荒土甚多

苗民懶於開挖棄之不問於是寨內頭人以爲公土租與天柱邛水一帶客民挖種雜糧所租之地並無界限每丁認鋤一把每鋤每年租錢數百文不等客民自認租錢任意擇地而種窮一人之力徧山壑挖此處利厚於彼卽舍彼而就此隨地搭窩穴從靡有定處挈室而來漸招親故上里尙少下里頗多甚有恃其强悍硬開硬挖成羣結黨每啟苗民爭競之端道光三年古州下江生苗與紅苗構訟紅苗之逞兇佔種卽與蓬戶無異其弊不可勝言惟賴地方官責令引進之頭人稽查各戶不準遷移只向一處

開挖則所佔之荒地尙屬有限若再聽其任意開挖則蓬戶較苗人善於力作又與各客戶親情鄉誼氣味相投勢必將佃種客業之苗人互相排擠此蓬戶之不可不勤爲防範者也復有抱琴塘一處與縣屬所轄之苗度洞相爲表裏其地卽清江之北境台拱之東北昔張經略由八弓繞道梁土汛進定清江復由勝秉移駐凱里卽其地也今則同於腹地其徵糧起科苗漢無異計邛水邊方上下二里客民四百七十二戶內無苗產及蓬戶典買苗產客民三百八十八戶偏橋左右兩司客民四十五戶內隔屬客民典買

田土不填丁口十八戶有產客民一十七戶抱琴塘
典買苗產客民二十八戶寨外有苗產之戶十五戶
縣屬之苗度洞客民十六戶有苗產者僅二戶統計
府縣兩屬苗寨內外有產無產客民共五百六十一
戶 清江台拱兩廳昔爲生苗巢穴自張經略削平
之後迄今百有餘年苗類尙復不少清江東南兩面
地接黎平西抵台拱西南毘聯都勻之丹江安設左
右兩衛千總兩員屯堡十有一處台拱及台拱所屬
之黃施各設一衛每衛千總一員共設屯堡十有二
處四衛屯軍三千數百餘戶碁布星羅分屯各堡始
則各屯戶服力其中田土山場界限井然繼而各省
客民來者接踵矣蓋清江台拱苗地初平非若各屬
苗田照內地則例起徵有秋折銀糧有改徵米石每
年僅領採買向有成數照數完納故來者特多也就
二廳而論台拱地接丹江南通牛皮箐其蓮花屯一
帶界連古州之朗洞各寨懸崖絕壑地利甚微非若
清江之地接黎平清水江界乎其中更有柳霧縣丞
借地設官之處爲下河要區天柱邛水之客民易於
蠶食而入故清江客民又多於台拱顧設屯之始無
非撫馭歸順餘苗並禁約漢奸私入煽誘播弄構釁

農隙之時仍須入伍操練是以擇其扼要處所建築
汛堡苗多則屯戶多苗少則屯戶亦少卽於田土夾
雜處所逐一區畫整齊務令屯兵與苗人界限井然
所以杜後來攙混侵佔之弊也矧上田六畝中田八
畝下田十畝悉皆膏腴而又籌及棲身無所耕種無
貲且不能裹帶餘糧以待收穫每戶給修葺房屋銀
三兩牛具籽種銀五兩並給口糧秋冬應募者接濟
至夏收春夏應募者接濟至秋收計口授食以待收
成設屯之制相待不可謂不厚不料各屯戶卽因其
隴畔相連窺伺愚苗得其虛實肆腹削以致苗民

有虎狼之畏其盤剝勾引更甚於客民遠矣務須地
方官責之百官總旗嗣後屯田不準別佃客戶承種
只準招佃苗人亦不準屯戶中私相授受如其無力
耕種各自向地方官衙門呈明先儘苗人次及屯內
如此繩其現在庶幾可做將來此屯軍之不可不嚴
爲約束者也台拱廳屬設有土弁九名通事九名分
管各寨並未設有鄉頭客長苗寨內外客民共二百
一十四戶內無產客民二十戶隔屬有苗產客民未
填丁口十二戶典買苗產客民一百八十二戶清江
廳屬設有土弁通事十八名鄉約鄉頭四十九名分

黑南聯方系田卷六
三
為城廂內外及東西南北四岸並南洞司地方共計
客民五百九十三戶內無產二百二十戶典買苗產
客民三百七十三戶 黃平州在施秉西六十里去
府一百二十里再由黃平而南一百二十里為岩門
司設土吏目一員由岩門司西為朗城司設土吏目
一員雍正六年已經裁汰由朗城司折而北為重安
司設長官司一員三司西抵都勻府清平縣縣丞所
駐之凱里南抵都勻府通判所駐之丹江鎮遠西南
境止於此雖云地接苗疆然而漢民錯處其間歷年
久遠苗產盡為漢有苗民無土可依悉皆圍繞漢戶

而居承租佃客民田土耕種昔日之苗寨今盡變為漢
寨矣今計州屬客民共六百六十八戶內無苗業二
百零七戶住居城市未填丁口十五戶寨內寨外典
買苗產客民四百四十六戶 天柱縣在府東南一
百八十里由天柱縣又東南五十里為遠口巡司今
改名鎮遠巡司屬天柱縣遠口南抵黎平東抵會同
鎮遠東南境止於此縣屬地方毗連清江廳屬之柳
霽南洞一帶苗寨所轄悉係薙髮尚苗言語服飾與
漢無異並無蓄髮苗人攙雜其間康熙間縣內童生
入學額取之外向有苗生三名因尚苗恥居苗類不

願有苗生名目已經前縣詳請裁汰近年以來雖閒
有貿易客民置買田產落業居住彼此聯爲婚媾相
習相安不待編查也其柳霽縣丞雖歸清江廳管轄
實爲天柱縣地 施秉縣在府西六十里由施秉縣
南九十里爲勝秉縣丞分駐之地今改名施秉縣丞
屬施秉縣在府治西南六十里施秉縣內悉皆漢戶
僅勝秉縣丞所轄之景秉漏三洞地方閒有成塞苗
戶其地濱臨清水江清水江者古名劔河舊陷苗境
不通舟楫雍正七年張經略開闢苗疆始行開濬江
源發自都勻千有餘里達黔陽以入沅江帆檣商賈
泝流而上抵府屬之石洞口而止再上方爲勝秉所
轄之三洞山勢逼仄土田磽薄民苗稀少此施秉之
情形也計三洞客民共二十六戶內無苗產之戶十
五戶典買苗產客民僅十一戶 統計府屬各廳州
縣苗寨內外有業無業並隔屬典買苗產住居城市
客民共二千零六十二戶

思州府

思州府唐宋思州地也元置思州安撫司統今二思
石黎鎮諸府明洪武五年分置思州思南二宣慰司
此爲思州宣慰司隸湖廣省永樂十一年鎮遠侯顧

成平思州思南廢二宣慰司分其地爲八府此爲思
州府改屬貴州布政司隆慶二年遷思州府治于平
溪衛萬歷五年還舊治雍正五年割湖廣平溪清浪
二衛來屬改爲玉屏青谿二縣於是思州始有屬縣
其四至東一百六十里抵湖南沅州府界西一百里
抵鎮遠府界南一百一十里抵黎平府界北一百二
十里抵銅仁府界東北一百一十里亦與銅仁府接
界西南二十里與鎮遠府接界西北一百二十里與
銅仁府接界東南一百里與湖南沅州府接界此又
思州之四隅也府境廣二百六十里袤二百三十里

東北至西南斜袤一百三十里西北至東南斜袤二
百二十里府治在省城東北五百四十里其東南四
十里爲玉屏縣西南三十里爲青谿縣滇楚驛道自
湖南之晃州廳西入首歷玉屏青谿二縣始達鎮遠
二縣咸濱漁水之上爲舟楫會聚之所實水陸通衢
也府治居驛道之北返爲僻遠府屬別有陸路東通
銅仁西出青谿南至八弓北湊石阡形勢控臨蠻徼
關鎖全黔亦西南要區也 府轄四司附郭居民不
滿百家四司曰都坪峩異司卽元之臺蓬若洞注溪
長官也府治郊郭之間咸其所司曰都素司在府治

西九十里曰黃道溪司在府治東北百三十里曰施溪司在府治北二百五十里元之施溪樣頭長官也本屬順元路明洪武五年東遷於此改屬湖廣沅州衛永樂十二年始來屬土司所管之地多係漢民情形與石阡思南相類惟府南有洞人約五六百戶其俗採毛爲絮以禦寒飲食避鹽醬夫婦出入必耦詣言衣服略與漢同又有山苗居後山洞諸寨苗類僅此二種而已土田皆納秋折糧銀亦無苗產民產之分云 玉屏縣本元平溪長官所地屬思州安撫司明洪武二十三年置平溪衛屬湖廣都司萬 二十

九年改屬貴州三十一年還屬湖廣雍正五年改衛設玉屏縣隸思州府此玉屏置縣之始也其四至東抵晃州廳界五里西抵青谿縣界三十里南抵晃州廳界八里北抵本府界二十里四隅東北八十里與府屬黃道司交界西南五里與晃州廳交界西北二十里與府屬都坪司交界東南三里與晃州廳交界縣境廣三十五里袤二十八里西北至東南袤二十三里惟東北至西南袤近九十里然所屬之波州新莊龍溪口曹家田埂坪等地離城七八十里者多插入本府及晃州芷江界中畸雜華離難以整計虛地

尚不能有九十里之縣亘故幅員爲最狹小舊衛轄有三屯曰平屯曰沅屯曰麻屯雍正六年置縣時劃沅麻兩屯歸芷江管轄僅以平屯三里兩甲歸縣屯戶僅三十有餘皆明時軍籍也縣地據黔楚之交爲入黔之第一門戶五方之民雜處故客戶亦殊不少縣北僻路歷蠟崖山爲通銅仁施溪六洞水銀山諸苗之道最爲險要又縣南之道可達革溪天塘縣西之途可抵新溪浦洞咸爲隔屬之苗境縣境內又有洞苗雜錯居於屯戶客戶之間然不及漢戶之多土田皆納秋折糧銀謂之漢戶亦可也 青谿縣本元

之大坪郵地明置清浪衛于清浪關隸湖廣都司萬曆二十九年改屬貴州三十一年還屬湖廣雍正五年改衛置青谿縣隸思州府此清谿設縣之始也其四至東抵府屬羊坪界二十五里西抵鎮遠府鎮遠縣界五十里南抵鎮遠府界五十里北抵本府界二十里四隅東北二十里與本府交界西南二十里與鎮遠府交界西北二百里與印江縣交界東南五十里與湖南沅州府芷江縣交界縣境廣七十五里袤七十里東北至西南袤四十里西北至東南袤二百五十里幅員較玉屏爲廣然亦有華離之地隔越其

中西北至東南雖云二百五十里不首尾聯接也縣城臨青溪青溪卽濩水也故縣城亦爲水陸聚會之區縣境分爲數屯其土田惟漏溪一屯兩山夾峙爲燒瘠之鄉餘屯尙多膏腴也舊戶悉皆前明之軍籍新來客戶則聚居郭下者爲多然無苗民准土著與客戶相安日久無事區分也

石阡思南二府

石阡府宋名承州爲羈縻州元爲石千長官所隸思州宣撫司明初改石阡長官司隸思南宣慰司永樂十一年始置石阡府領龍泉葛彰苗民石阡正石阡

副五長官司萬歷二十九年改龍泉長官司爲龍泉縣隸府康熙雍正間疊革葛彰苗民石阡正三長官司現領龍泉縣一石阡副長官司一其境南通鎮遠之大地方北距思南之塘頭東抵銅仁之龍塘坳西連遵義之濫泥山烏江一水自西南來橫府境北流折而東以入思南界府轄爲在城龍底江內江外水東苗民苗半七里石阡副長官司在其中各里間有散處苗人俱係漢民佃戶四散圍繞漢寨而居並無成寨居住者惟苗半里間有成寨苗戶數處第各苗戶亦並無產業爲客民典買其龍泉一縣在烏江之

東所管封岩長磧二里偏刀水一處境內無苗民散處 思南府宋政和中蕃部長田祐恭內附卽入版圖改設州縣廢置不常元時始設軍民安撫司後復改爲宣慰司明洪武以前皆田氏世襲隸湖廣布政司永樂十一年田氏始廢設思南府改隸貴州雍正七年定轄安化婺川印江三縣而以蠻夷正副朗溪正副沿河副五長官司爲府親轄其地在烏江之北幅員八 廣闊東抵銅仁府之烏羅司界西越龍泉至遵義府交界南越石阡至鎮遠府交界其東北一隅迤邐四川之彭水酉陽兩州縣地附郭爲安化縣

西北四百里爲婺川縣東以北四十里爲印江縣黔省郡縣惟思南屬歸流最早是以境內悉係土著漢民旣無客戶亦無苗種惟安化縣所轄村江堡甕四圖每圖十里有東越印江縣括花在松銅之間爲半河地方有苗民十餘寨自縣至彼計程四日距鎮遠四十八溪主簿分駐之地不滿十里其地設有苗弁三名有典買苗產客民十戶附寨居住並無苗產各有生理之戶又八戶

銅仁府

銅仁府宋元以前係洞蠻地前明改土歸流永樂十

一年始置銅仁府萬歷二十六年置附郭之銅仁縣
而以省溪提溪烏羅平頭四土司地爲府屬親轄其
土司世襲之正副長官卽係蠻酋有功自明迄今相
沿準其承襲其所管洞蠻自前明地入版圖稱爲洞
民數百年來輸租納稅不特讀書識字抑且拾紫膺
朱文教蒸蒸今異於古黔省各郡洞民大都類是不
特銅仁一郡爲然也郡治舊日四至西北西南東南
三面地接思南思州東聯楚壤北抵蜀境自正大營
以北俗名三不管地昔爲紅苗所踞康熙四十二年
平定紅苗設正大營同知雍正八年平定紅苗移正

大營同知駐松桃嘉慶二年始陞爲直隸廳專轄坡
東坡西苗地而益以烏羅平頭兩土司烏平二司在
銅郡西北提溪一司爲銅郡西鄙惟省溪司與郡治
最近其聯松桃苗地昔年安插漢戶均有成熟老田
額糧一概撥歸松桃管轄乾隆間省溪前洞內科股
旁苗漢接連之處續報新墾田地升糧卽照內科股
則例起征與松桃苗地僅完無畝粟糧有別因名其
地爲外科股復自松桃撥歸府屬管轄而附徵糧於
省提二司八洞之內此外科股苗地仍隸銅仁之由
來也其餘如提溪所轄之前洞凱土洞淳和里共三

洞省溪所轄之前洞迪羅瓮怕敖寨六家共五洞均係洞民久入版圖每司設正副長官各一員外又設流官省提吏目一員以資彈壓縣屬地方昔爲大萬山司及銅仁長官司地置縣之後改轄十一鄉三面距省溪司地其桃映坡頭客寨扣答平茶長坪壩盤木抱萬山等九鄉亦俱洞民住種已久與松桃廳屬之烏平二司事同一律惟龍魚鄉之漣洞股瓮答鄉之鷓鴣股兩處及牛郎場有苗民二十八寨共設土弁九名其地與府屬外科股均係一線相聯並與松桃之構皮汎石峴衛接壤外科股住有苗民三十五寨共設土弁二十一名其附寨客民並不附苗寨當買苗產客民計外科股各寨十六戶漣洞鷓鴣兩股各寨及牛郎場地方七十戶共八十六戶

松桃廳

松桃廳昔係銅仁府分防同知嘉慶二年改爲直隸同知撥銅仁府之坡東坡西及烏羅平頭兩土司地歸廳管轄烏羅正副長官司二員共管十三洞平頭正副長官司二員共管十五洞悉係前明安插漢戶久隸版圖並無苗民夾雜之處其苗寨盡在坡東坡西兩支坡東界聯楚省永綏鳳凰兩廳銅仁府之正

大營縣丞盤石巡檢借地設官其地深入苗巢客戶
尚少坡西地接烏平二司北界四川秀山縣地爲漢
苗接壤之處漢戶頗多自松桃改直隸廳時添設松
桃一協額兵二千六百餘名松桃城外坡東坡西又
設二十三汛堡益以銅仁協之汛堡七處星羅碁布
與苗寨相爲錯綜客民所住之寨總不外汛堡相近
之間大約坡東汛堡多於坡西兵弁之典買苗產者
坡東爲最坡西場市多於坡東客民之典買苗產者
坡西爲尤蓋坡東一帶毗聯湖南之處自南至北百
數十里碉卡接連相去一里半里卽設一座均係汛

堡兵丁看守是以各汛堡相距不過四五里遠者則
至七八里每一汛堡額設兵丁五六十名七八十名
有多至一百數十名者其所駐兵丁向不更調各官
家室屯住汛堡之內客民之貿易營生及耕種度日
之戶有附居苗寨者亦有卽於汛堡中間相離咫尺
自蓋房屋居住者客民典買苗產旣多而營兵典買
苗產者亦復不少弁兵擅得苗產本干例禁無如客
民中有祖父時卽行典買子弟入營當兵亦有武生
就近典買因而入營得升把總外委坐汛坐堡者其
苗產每多得自未入營以前不能盡科以擅得苗產

之罪今概同務農客民填註入冊其他湖南之永綏鳳凰四川秀山各鄰省客民以及江西湖廣各省會館向苗人當買之產亦復不少又坡東坡西乾隆初俱有安插老戶歲納秋折銀糧其苗民田土僅由銅仁府無畝粟糧內撥三十六石有零歸廳上納而已客民典買苗產遇有糧者卽隨納無畝粟糧竟有無糧者則苗民開墾荒土成熟典賣客民之產及遠年苗民荒土客民典買之後自行開墾今成熟地之產此松桃客民典買苗產無糧者多有糧者少所由來也共計坡東十九汛墾土弁八十八名鄉約三十名

客長十八名共管漢苗三百七十三寨內附居苗寨典買苗產之客民四十六戶並不在苗寨居住典買苗產之客民二百六十七戶共三百一十三戶坡西十一汛堡暨松桃城土弁六十二名鄉約六十二名客長三名共管漢苗三百零九寨並無附居苗寨典買苗產之客民其不在苗寨居住典買苗產之客民共五百四十四戶統計坡東坡西共八百五十七戶又查松桃管轄之石峴衛在松桃治西南六十餘里從前名爲上潮下潮悉係苗寨嘉慶六年勦除盡淨設立該衛轄屯兵四百戶每五十戶爲一堡共有八

黔南職方紀略卷六
堡週圍建礮八十餘座其制與各衛不同其田無上
中下之分每兵一名撥給田四畝別有官屯二百四
十畝各屯分種而屯官按畝各分半息以作俸工其
地近烏平二司並無苗寨亦無典買苗產之戶

黔南職方紀略卷六終



